



**Mahein Nia Lian Nú 40, 22 Outobru 2012**

## **UNPOL<sup>1</sup> Nia Realizasaun Husi 2006 – 2012**

### **Introdusaun**

Krizi 2006 núdar istoria metan ne'ebé hakerek iha diarú instituisaun Polísia Nasional Timor-Leste - PNTL. Tanba iha 2006 nia klaran, parte boot setór siguransa Timor-Leste naksobu tiha no husik nasaun joven ne'e besik atu monu bá funu sivil. Nasaun ninia instituisaun Polísia Nasional Timor Leste (PNTL) no FALINTIL-Forsa Defeza Timor-Leste (F-FDTL) ikus se kilat ba malu, governu husu prezensa forsa hametin dame ne'ebé dirize husi Australia no UNMIT liu husi United Nation Police – UNPOL hodi restaura orden públika.

Eventu tráziku husi Abril to'ó Juñu 2006 ne'ebé hamate maizumenus ema nain 37<sup>2</sup> iha violénsia no liu ema na'in 150,000 mak muda sai husi sira ninia knua fatin – hamate dis-funsaun bá setór siguransa. "Krize" hanesan eventu 2006 ne'ebé kuiñesidu to'ó ohin loron, hatudu katak ninia substánsia bá parte barak setór siguransa nian inklui farda no kilat iha momentu ne'ebá. Ida ne'e sai klaru katak Timor-Leste prezisa prosesu komprensivu atu halo reformasaun bá setór siguransa nian.

Tuir rezolusaun Konsellu Siguransa 1704 (2006) 25 Agostu 2006, 1745 (2007) 22 Februari 2007 no 1802 (2008) 25 Februari 2008 fo mandatu bá UNMIT mak atu garante involvimentu konstrutivu entre UNPOL no PNTL iha prosesu hasa'e kapasidade polísiamentu liu husi aranju ne'ebé iha hodi asegura estabilidade publiku iha Timor-Leste.

No, ajuda halo reforma no rekonstrui fila fali instituisaun PNTL. Inklui atu intensifika liu tan hodi kontinua ajuda monitoriza bá progresu treinamentu, institusionaliza no haforsa PNTL ho objetivu atu hasa'e efetividade, inklui tau matan bá nesesidade PNTL, kontinua garante no hametin siguransa publiku liu husi suporta PNTL, ho haforsa lejjzlasaun no siguransa to'ó PNTL simu fali responsabilidade.

Wainhira UNPOL simu mandatu iha mudansa signifikante bá setór siguransa Timor-Leste horik 2006, maske la'os hotu-hotu pozitivu. Liu tiha besik tinan tolu autoridade polísia ezekutivu, Polísia Nasoins Unidas (UNPOL) hahú tiha faze entrega knár bá instituisaun PNTL. Hatudu mós iha relasaun diak liu-tán entre PNTL no F-FDTL to'ó ohin loron.

### **Akordu Suplementar**

Tuir Akordu Suplementar 2006, Artigu 6 deskrebe kona-bá UNMIT nia suporta hodi institusionaliza PNTL hafoin krizi 2006, liu husi misaun UNPOL nian. Akordu Suplementar ne'e asina entre Primeiru Ministru Jose Ramos Horta ho Reprerzentate Misaun Integradu Iha Timor-Leste, Finn Reske Nielsen.

---

<sup>1</sup> United Nations Police

<sup>2</sup> Relatoriu CIGI: Monitor ba reforma seitor siguransa Timor-Leste. Dezembru 2009, Nú. 1.

## 1. UNPOL Kaer Komandu iha Siguransa Interna Timor-Leste<sup>3</sup>

Hare'e bá situasaun atúal Timor-Leste hafoin krizi politika no militar 2006, Polísia Nasional Timor-Leste (PNTL) tenki entrega poder bá United Nation Police (UNPOL) liu husi Akordu Suplementar iha loron 1 Dezembru tinan 2006 - atu bele reintgra fila fali situasaun bá normalidade tanba iha momentu ne'ebá timor-oan se kilat bá malu hodi hakaneke malu no oho malu.<sup>4</sup> Akordu suplementar ne'ebé asina entre governu Timor-Leste ho Misaun Intergradu Nasoens Unidas fo kbi'it bá UNPOL núdar responsabilizador bá setór siguransa iha Timor-Leste.<sup>5</sup> Mandatu UNPOL ka'er komandu remata iha 26 Marsu 2011, loron ida antes entrega oficialmente poder bá komandu siguransa PNTL liu husi seremonia aniversariu bá dala 11 iha Palasiu Governu, 27 Marsu 2011.<sup>6</sup> Maibé UNPOL kontinua fo sira nia asesoria liu husi Planu Dezenvolvimentu Konjuta to'o misaun remata iha Dezembru 2012.

Tuir akordu suplementar katak UNPOL ninia mandatu atu fo apoiu PNTL iha faze Tolu mak:

- a. Faze Inisial; UNPOL núdar responsabilizador uniku kona-bá operasaun polísiamentu, no lidera servisu operasaun polísiamentu nian inklui siguransa bá lideransa Timor-Leste nia.
- b. Faze Konsolidasaun; Responsabilidade servisu polísiamentu iha PNTL ninia liman maibé UNPOL nafatin fo apoiu liu husi monitoriza no konsellu, inklui ajuda iha planeamentu operasaun polísiamentu nian.
- c. Faze Rekonstrusaun; Membru PNTL hala'o servisu operacional polísiamentu tuir orden komandu PNTL nian no UNPOL foka bá monitoriza/advisor no ajuda servisu PNTL nian.<sup>7</sup> Husi faze sira ne'e UNPOL nian papel boot tebes atu rekonstrui instituisaun PNTL inklui apoiu lojistika mai husi UNMIT.<sup>8</sup>

Papel importante tebes ne'ebé UNPOL leba iha momentu ne'ebá hodi dezenvolve kapasidade institusional PNTL bazeia bá pontu prinsipal sira hanesan: haforsa lejizlasaun, ajuda prosesu eleisaun jeral 2007, hala'o polisia komunitaria, halo reformasaun no restrutura, rekonstrui no haforsa instituisaun, monitoriza no konsellu, treinamentu no tranferensia skill, edukasaun publiku no informasaun, dezarma, demobilizasaun no reintgra fali instituisaun PNTL.<sup>9</sup> Esforsu hirak ne'e UNPOL hala'o to'o faze ikus entrega poder bá PNTL.

Inklui mos establese Departementu importante sira hanesan Departementu Investigasaun Nasional, Departementu Operasaun, Departementu Stratejia Informasaun, Departementu Komandu UNPOL Distritu, Departementu Kordenasaun bá Reformasaun no

---

<sup>3</sup> FM hasai konvite iha 11 Setembru 2012 diriji bá Komisariu UNPOL Luis Carilho, no kofirmadu atu entrevista iha 12 Outobru 2012, wainhira peskizador atu halo entrevista hetan fali SMS husi Nú +6707732647 hakarak deit entrevista ho direktur FM.

<sup>4</sup> Akordu Suplementar 01 Dezembru 2006.p1.

<sup>5</sup> Tempo Semanal Edisaun 109: Torsa, 28 Outobru 2008.

<sup>6</sup> Media STL Edisaun Sigunda, 28 Marsu 2011.

<sup>7</sup> Power Point: Misaun UNPOL Iha UNMIT, 14 Juñu 2011.p14,16,18.

<sup>8</sup> Mahein Nia Lian Nú 21, 21 Jullu 2011. p1.

<sup>9</sup> Power point: Misaun UNPOL Iha UNMIT, 14 Juñu 2011. p1.

Rekonstrusaun, Departementu Planu Stratejiku, Departementu Standarizasaun Profesional no Disiplina<sup>10</sup> hodi fortifika diak liu tan instituisaun PNTL.

Husi pontu prinsipal ne'ebé sita iha leten UNPOL koko ona ezejuta hodi haforsa, hametin, no re-establese fali situasaun siguransa bá ambiente hakmatek. Núdar responsabilizador siguransa UNPOL konsege asegura eleisaun jeral 2007 no eleisaun jeral 2012 ho susesu liu husi apoiu treinamentu bá PNTL oinsa halo prevensaun bá konfliktus. Maibé tristeza boot UNPOL falla iha planeamentu oinsa antisipa konfliktus hafoin rezultadu eleisaun jeral ne'ebé mosu iha Distritu Baucau, Vikeke, Dili no Ermera iha momentu ne'e.<sup>11</sup> Situasaun ne'e akontese tanba realidade membru UNPOL barak mak mai ho kapasidade minimu, rotasaun servisu polísiamentu ne'ebé badak inklui kestaun lingua sai obstaklu boot bá polisia internasional ne'e sai núdar mestre no treinador ne'ebé diak bá PNTL.<sup>12</sup>

Parte polísiamentu komunitaria UNPOL implementa projeitu lubun balun ne'ebé realiza husi Nova-Zelandia iha Suai no Dili, parte Bekora.<sup>13</sup> Maske nune'e pursentu pratika aprosimsaun polísiamentu komunitaria minimu tebes, ida ne'e korespondente ho atusaun PNTL iha terenu. Hanesan liu tiha tinan Rua UNPOL ka'er komandu, relatoriu UNHCR relata katak husi periodu 1 Jullu 2009 to'o 30 Juñu 2010, rejistu kazu 87 kona-bá tratamentu aat no uzu forsa maka'as liu husi membru PNTL wainhira halo atusaun hasoru komunidadade.<sup>14</sup>

Seluk mak atusaun memeburu PNTL eskudra Becora hasoru konfrontasaun enter joven Au-hun-Becora no Bidau, loron Sabadu (04/06/2012) la ho aprosimsaun polísiamentu komunitaria maibé uza forsa hodi halo torturasaun hasoru parte sira ne'ebé halo konfliktus.<sup>15</sup> Atusaun PNTL uza forsa hasoru asaun pasifiku ne'ebé organiza husi Estudate no Sindikatu Traballadores iha Hotel Timor nia oin, iha 2 Maiu 2012, hodi rezulta ema 3<sup>16</sup> kanek no vidru hotel nian rahun. **Jeitu aprosimsaun militeristiku husi membru PNTL Distritu Dili hasoru manifestasaun ne'e remata ho asaun violensia no konsege detein ema na'in 84 kompostu husi mane 75 no feto nain 9.**<sup>17</sup>

No, membru PNTL Distritu Baucau halo agresaun fiziku bá feto ida ho naran Odete Varela ne'ebé lori kazu to'o Parlamentu Nasional<sup>18</sup> ne'e halo FM relembra fali UNPOL nia falla iha 2004 katak formasaun polísiamentu komunitaria ne'ebé fornese husi UNPOL bá PNTL ladún tasak no UNPOL la labele hatudu ninia responsabilidade ne'ebé masimu.<sup>19</sup> Nune'e mos laiha seriadade husi Komandante Jeral PNTL Longuinhos Monteiro hodi fo medidas bá membru PNTL sira indisiplinadu ne'ebé ikus mai afeita instituisaun PNTL ladún hetan konfiansa husi publiku.

<sup>10</sup> <http://unmit.unmissions.org/Default.aspx?tabid=12058&language=en-US>

<sup>11</sup> Mahein Nia Lian Nú 19, 28 Abril 2011.p1.

<sup>12</sup> [http://www.crisisgroup.org/en/regions/asia/south-east-asia/timor-leste/180-handing-back-responsibility-to-timor-lestes-police.aspx?alt\\_lang=id](http://www.crisisgroup.org/en/regions/asia/south-east-asia/timor-leste/180-handing-back-responsibility-to-timor-lestes-police.aspx?alt_lang=id)

<sup>13</sup> <http://temposemanaltimor.blogspot.com/2008/10/tempo-semanal-edisaun-109.html>

<sup>14</sup> Relatoriu UNHCR 2010 Kona-bá Dezenvolvimentu Diretus Umanus iha Timor-Leste, pdf.p8

<sup>15</sup> Media Tempo Semanal, Segunda, 06 Maiu 2011.

<sup>16</sup> Media STL Edisaun, Kuarta, 02 Maiu 2012.

<sup>17</sup> <http://thetimornews.com/component/content/article/83-domestic/181-pntl-detein-nain-84.html>

<sup>18</sup> Media Partidu CNRT: <http://partidocnrt.com>, Torsa, 25 Agostu 2011.

<sup>19</sup> [www.crisisgroup.org](http://www.crisisgroup.org) ; Asia Report No. 180 Dezembru 2009.

Parte seluk, atu bele garantia komunikaun no informasaun entre UNPOL, PNTL no Komunitade, UNPOL fasilita mos rede komunikaun no tradutor timor-oan. Ida ne'e núdar meus diak husi UNPOL bá prosesu konsolidadaun no rekontrusaun setór siguransa iha momentu ne'ebá. Maibé UNMIT ninia esforsu hodi promove reforma setór siguransa Timor-Leste hafoin krizi 2006 hatodan an tiha ho problemas estruktural internal balun iha momentu ne'ebá. Hanesan UNPOL hetan tiha kítika tanba komunikaun ne'ebé kiak (problema lingua) ho sira ninia ómologu polisia nasionál nune'e mós ho populasau Timorens, tanba sira ninia perísia ho lian lokál no tradutores insuficientes<sup>20</sup>. No, triste boot ida mak instituisaun PNTL to'o ohin loron sei mukt iha infrastruktura hanesan radio komunikaun (HT) ne'ebé mos sai preokupasaun bá governu, partikularmente Sekretariu Estadu Siguransa, Francisco Guterres.<sup>21</sup>

Seluk mak liu tiha tinan ida UNPOL ka'er komandu siguransa internal UNPOL falla fo garantia siguransa ba parte balun iha Dili laran maibé wainhira Kuartu Governu ne'ebé lidera husi Xanana Gusmão hari'i PNTL *Task Force* konsege hapara violensia Arte Masiais.<sup>22</sup> Tuir Fundasaun Mahein nia konsente katak UNPOL ladún iha kuinesementu klean kona-bá tipu violensia iha Timor-Leste hodi halo planeamentu no forma PNTL tuir tipu violensia hodi bele atua no prevene konfliktus Arte-Marsial iha rai laran.

Kestaun UNPOL núdar asesoria ka konsellu bá PNTL mos sai problematiku tebes. Politika rotativa ás bá funsionáriu UNPOL iha momentu ne'ebá, rezultadu ida husi rotasaun badak (fulan 6-12) bá polisia balun – kontribui bá estadu sira kria tiha inkonsisténsia no konfuzaun iha esforsu bá treinu no monitoriza. Ida ne'e hasusar membru PNTL atu intende no adapta bá substansia husi asosiaría ida bá asesoria seluk. Pior liu tan mak lokalizasaun hamutuk unidade sira PNTL no UNPOL la koko tiha tuir substantiva, rezultadu maka polisia rua ne'ebé servisu ho kolaborasaun bá malu, maibé nunka "hamutuk" duni.<sup>23</sup>

Maske nune'e UNPOL nafatin esforsu no koko atu fo treinamentu no fo monitorizasaun bá membru PNTL iha aspetu operasaun, investigasaun, lojístika, adminstrasaun no seluk tan. Maibé rezultadu peskiza Fundasaun Mahein identifika katak situasaun hanesan ne'e iha momentu ne'ebá hasusar membru PNTL atu adapta lalais asesoria no treinamentu ne'ebé UNPOL fornese. Ida ne'e mos tanba membru PNTL balun ladún iha interese nomós dezafiu seluk mak lingua. Ba kestaun ne'e, Fundasaun Mahein fanu governu atu aproveita tempu restu ne'e hodi servisu hamutuk ho nasoens unidas atu fo kapasitasaun masimu bá PNTL iha area investigasaun kriminal nian. Ida ne'e sei ajuda PNTL iha futuru hodi halo prosesamentu bá kazu sira ho rapida no professional tuir padraun polisia modernu no mundu globalizasaun nian.

## **2. Nasaun Doadores UNPOL**

Situasaun siguransa husi impaktu krizi 2006 fo fali tan oportunidade bá dala-rua UNPOL kaer komandu siguransa interna, etapa dahuluk iha tempu UNMISSET ne'ebé enterga poder bá PNTL iha 2004. Misaun Integradu Nasoens Unidus liu husi UNPOL hodi fo apoiu asistensia siguransa bá povu no nasaun Timor-Leste. Ambiente ne'e bolu atensaun no

<sup>20</sup> <http://www.ssrresourcecentre.org/wp-content/uploads/2010/06/SSRM-East-Timor-v.1-Tetum.pdf>

<sup>21</sup> Media Diariu Nasional Edisaun, Kuarta, 17 Outobru 2012.

<sup>22</sup> Media Tempo Semanal, Tersa, 21 Outobru 2008.

<sup>23</sup> Relatoriu CIGI: Monitor ba reforma seitor siguransa Timor-Leste. Dezemburu 2009, Nú. 1.

solidariedade nasaun hamutuk 41 hodi fo apoiu assistensia siguransa iha misaun UNPOL nian. Total membru UNPOL hamutuk 1.250 pesoas, mane hamutuk 1.162 pesoas, feto hamutuk 88 pesoas, polisia pesoal hamutuk 760 pesoas no unidade polisia formadu hamutuk 490 pesoas.<sup>24</sup> Iha 2010, ONU mantein hela prezensa ninia polisia ho total hamutuk pesoal na'in-1.280 hodi fo apoiu ba PNTL to'o eleisaun jeral 2012 remata<sup>25</sup>, dadaun ne'e UNPOL planeia hela atu sai husi Timor-Leste iha Tinan ida ne'e.

No, nasaun sira ne'ebé fo dóasaun membru UNPOL barak liu hanesan; Malayzia hamutuk 230 pesoas ne'ebé kompostu polisia komunitaria 90 no polisia formadu 140 pesoas. Husi nasaun Portugal hamutuk 184 pesoas ne'ebé kompostu husi polisia komunitaria hamutuk 44 no polisia formadu hamutuk 148 pesoas. Nasaun Bangladesh; membru UNPOL hamutuk 124 pesoas; polisia komunitaria hamutuk 19 pesoas no polisia formadu 105 pesoas.

Parte nasaun Pakistaun haruka nia polisia hamutuk 126 pesoas; polisia komunitaria hamutuk 21 pesoas no polisia formadu hamutuk 105 pesoas. Tuir estatistika hatudu número UNPOL ne'e barak liu mak mai husi unidade polisia komunitaria ho kuantidade 760 pesoas no polisia formadu hamutuk 490 pesoas deit.<sup>26</sup> Maske nune'e UNPOL laiha konseitu ba longu prazu nian liu husi haforsa polisiamentu komunitaria ne'ebé fo perigu ba esforsu atu forma PNTL sai profesional. No, governu mos kontribui ba polisiamentu para-militar ne'ebé hasusar hodi fahe lolos liña entre militar no polisia.<sup>27</sup> Tanba ne'e, Fundasaun Mahein rekomenda ba governu atu fortifika polisiamentu komunitaria liu husi koperasaun bilateral ne'ebé iha ona hodi forma PNTL sai profesional hodi halo prevensaun konflitus tuir strandarizasaun polisiamentu internasional nian.

Iha sikun seluk kona-ba apoiu UNPOL ba formasaun polisia investigasaun nian mos bele konsidera sei mukt tebes. Skalasaun argumentu ne'e indika iha kazu barak PNTL la konsege halo investigasaun, ikus mai kazu hirak ne'e taka. Maske nune'e UNPOL koko fo apoiu masimu atu hametin paz no hakmatek iha Timor-Leste, maibe ikus mai falla iha esforsu hirak ne'e atu rekonstrui instituisaun PNTL ou hasa'e sistema kontrolu implika ba membru PNTL barak involve iha kazu krimi no indisciplinar.

Ida ne'e relata ba pursentu as kazu krimi ne'ebé akontese no hasusar iha prosesu investigasaun hodi implika kazu barak mak taka hanesan; iha 2007 hamutuk 239, iha 2008 hamutuk 256, iha 2009 hamutuk 145, iha 2010 hamutuk 212 no 2011 mak foin iha redusaun ba kazu pendente hamutuk 3 deit.<sup>28</sup> Hare'e ba statistika ne'e Fundasaun Mahein konsidera UNPOL falla iha kontrolasaun. Tanba ne'e rekomenda ba governu atu haforsa polisiamentu investigasaun no hametin disiplina liu husi aplika sasaun ne'ebé todan wainhira membru ruma komete erru ou indisciplinadu.

### **3. UNPOL Entrega Poder Siguransa Ba PNTL (2008 – 2011)**

Depois liu tiha tinan balun UNPOL ikus mai entrega poder siguransa nian ba PNTL. Entrega poder ne'e durante tinan Tolu nian laran, hahu husi 2009 to'o 2011. Iha 2004, UNMISSET nia tempu UNPOL entrega dahuluk poder komandu siguransa rai laran ba PNTL ne'ebé ikus

<sup>24</sup> Power Point: Misaun UNPOL iha UNMIT, 14 Juñu 2011.p2-3.

<sup>25</sup> <http://unmit.unmissions.org/Default.aspx?tabid=12130&ctl=Details&mid=15786&ItemID=19603&language=en-US>

<sup>26</sup> Power Point: Misaun UNPOL iha UNMIT, 14 Juñu 2012.p4.

<sup>27</sup> [www.crisisgoup.org](http://www.crisisgoup.org): Mengembalikan Tanggung Jawab Kepada PNTL, 3 Desember 2009.

<sup>28</sup> Mahein Nia Lian Nú 21, 21 Jullu 2011: Dezenvolvimentu PNTL.p16.

mai naksobu fali iha krizi 2006. Wainhira mosu krizi publiku kondena UNPOL no kritika misaun UNMIT katak treinamentu ne'ebé oferese liu husi mandatu UNPOL ladún tasak no suficiente bá PNTL iha tempu refere.<sup>29</sup>

Wainhira atu hakotu Mandatu UNPOL iha Timor-Leste no intrega siguransa bá Polisia Nasional Timor- Leste - PNTL ne'e liu husi asina akordu entre representante ONU iha Timor-Leste Ameerah Haq ho Prmeiru Ministru Xanana Gusmão iha Salaun Konferensia Primeiru Ministriu Palasiu Governu, iha 26 Marsu 2011. Asina akordu ne'e partisipa husi Sekretariu Estadu Siguransa Francisco da Costa Guterres, Vice Primeiru Ministru Jose Luis Guterres, Komandante Jeral Komisariu Longuinhos Monterio, Komisariu UNPOL Luis Carinho ho representate UNMIT no UNPOL iha Timor Leste.<sup>30</sup>

Prosesu tranferensia poder siguransa interna husi UNPOL bá PNTL núdar faze ikus ne'ebé hakerek iha Akordu Suplementar 2006. Tuir planu stratejia UNPOL nian, wainhira tama faze tranferensia poder siguransa interna ne'e bazeia pontu importante hirak mak *dahuluk*; situasaun siguransa komesa diak, *daruak*; estabilidade institucional la'o stavel ona, *datoluk*; estabilidade lojistiku instituisaun, no *dahat*; pelumenus 80% membru PNTL hetan ona sertifikasaun husi painel awaliasaun husi UNPOL nian.<sup>31</sup>

Intermus pursentu sertifikasaun membru PNTL, estabilidade institucional no siguransa interna karik tama ona kriteria maibé bazeia bá kontestu instituisaun PNTL rekursu humanu kontinua sai hanesan obstaklu bá prosesu dezenvolvimentu institusional atu fornese siguransa ne'ebé diak bá comunidade.<sup>32</sup> Nune'e mos formasaun bá area servisu nian hanesan administrasaun, jestaun, formasaun espesialista bá polisiamentu, investigasaun, planeamentu, operasaun inklui formasaun sira seluk ne'ebé profesionaliza servisu PNTL.<sup>33</sup> Ho ida ne'e Fundasaun Mahein sujere bá governu atu kontinua parseiru ho ONU inklui koperasaun bilateral sira ne'ebé durante ne'e hala'o ona hodi forma PNTL tuir padraun polísiamentu ne'ebé modernu no profesional.

UNPOL hahu prosesu konsolidasaun primieiru 2008 iha kapital Dili hodi entrega simbolikamente postu unidade 3 ba PNTL mak responsabilidade servisu siguransa iha postu Bairo Pite, Merkadu lama no Bidau.<sup>34</sup> No, PNTL simu hikas ninia responsabilidade prinsipál polísiamentu nian iha Maiu 2009. Dezenvolvimentu importante ida akontese hafoin tranferensia primeiru maka aprovasaun sistema promosaun nian bá PNTL, ne'ebé impleta tiha ona iha inísiu 2010.<sup>35</sup>

Entrega servisu polísiamentu bá PNTL primeiru faze iha 2009 bá Distritu Hat mak: Distritu Lautem, Oe-Cusse, Manatuto no Vikeke. No, tinan tuir mai 2010 – UNPOL entera kedas poder iha distritu Neen mak; Distritu Ainaro, Baucau, Likisa, Ermera Aileu no Manufahi. No,

---

<sup>29</sup> [www.crisigroup.org](http://www.crisigroup.org) ; Asia Report No. 180 Dezembru 2009.

<sup>30</sup> Media STL Edisaun Sigunda, 28 Marsu 2011.

<sup>31</sup> Power Point: Misaun UNPOL iha UNMIT, 14 Juñu 2011, p12.

<sup>32</sup> Mahein Nia Lian Nú 21, 21 Jullu 2011.p3.

<sup>33</sup> <http://www.fundasaunmahein.org/2011/08/23/mahein-nia-lian-21-dezenvolvimentu-polisia-national-timor-leste/>

<sup>34</sup> Media STL Edisaun Tersa, 05 Febreiru 2008.

<sup>35</sup> Relatóriu husi Sekretáriu-Jeral kona-ba UNMIT (períodu 24 Setembru to'o 20 Janeiru 2010). p10.

faze transferensia ikus mak iha 2011 hanesan Distritu Covalima, Bobonaro no Dili.<sup>36</sup> Total membru PNTL iha distritu 13 ne'ebé hetan ona sertifikasaun nudar membru PNTL husi periodu 2009 to'o 2011 hamutuk 1.924 pesoas, feto hamutuk 444 pesoas no mane hamutuk 1.480 pesoas.<sup>37</sup> Transferensia poder siguransa ikus husi UNPOL bá PNTL iha Dili liu husi aniversariu PNTL bá dala 11, loron 27 Marsu 2011, lider masimu PNTL Longuinhos Monteiro hetan apresiasaun husi Ministru Defeza no Siguransa, Xanana Gusmão.<sup>38</sup>

**Tabela *Hand Over* Poder Siguransa Husi UNPOL Bá PNTL**

No	Distritu	Estatutu Simu Poder Siguransa	Númeru Dirativa	Total Númeru PNTL Simu Poder	Mane	Feto
1	Lautem	Simu Poder iha 14 Maiu 2009	01/2009	144	111	33
2	Oecussi	Simu Poder iha 30 Juñu 2009	02/2009	118	85	33
3	Manatuto	Simu Poder iha 25 Jullu 2009	03/2009	110	89	21
4	Viqueque	Simu Poder iha 05 Dezembru 2009	05/2009	138	111	27
5	Ainaro	Simu Poder iha 12 Abril 2010	01/2010	102	81	21
6	Baucau	Simu Poder iha 16 Abril 2010	02/2010	172	118	54
7	Liquisa	Simu Poder iha 07 Setembru 2010	03/2010	99	73	26
8	Ermera	Simu Poder iha 10 Setembru 2010	04/2010	130	101	29
9	Aileu	Simu Poder iha 21 Setembru 2010	05/2010	90	69	21
10	Manufahi	Simu Poder iha 24 Setembru 2010	06/2010	107	92	15
11	Dili	Simu Poder iha 27 Marsu 2010	09/2011	454	362	92
12	Bobonaro	Simu Poder iha 27 Marsu 2010	05/2011	133	91	42
13	Covalima	Simu Poder iha 27 Marsu 2010	04/2011	126	97	30
<b>Total Membru PNTL iha Distritu</b>				<b>1.924</b>	<b>1.480</b>	<b>444</b>

**Fontes: Relatoriu Fundasaun Mahein, 22 Jullu 2011**

Maske nune'e tuir Fundasaun Mahein la bele kontente deit bá mudansa poder husi UNPOL mai PNTL maibé presiza konsidera mos kestaun benefisiu husi apoiu UNPOL bá dezvoltamentu PNTL liu husi formasaun no treinamentu. Tanba tuir observasaun Fundasaun Mahein katak iha kontestu instituisaun PNTL sei infrenta problema boot iha rekursu umanu, disciplina no infrastrutura.

<sup>36</sup> Monthly Government Report-March 2011. UNMIT Government.

<sup>37</sup> Mahein Nia Lian Nú 21, 21 Jullu 2011. p2.

<sup>38</sup> <http://timor-leste.gov.tl/?p=4817&n=1&lang=tp>



Hanesan preokupasaun kona-bá asuntu infrastrutura mai husi Komandante Jeral PNTL Longuinhos Monteiro tanba UNPOL komesa sobu ona jerador ne'ebé monta iha distritu hodi fo apoiu bá servisu PNTL. “Durante ne'e malae UNPOL sira mak fornese ahi ka eletridade liu husi sira nia jerador sira, agora sira sobu hotu ona aset ne'e sira ne'ebé durante ne'e sira monta hodi fo apoiu bá knár Komandu Distritu sira”,<sup>39</sup> dehan Monteiro. Hare'e bá preokupasaun ne'e, Fundasaun Mahein alerta bá governu atu fo atensaun seriu hodi kria kondisaun adekua bá PNTL sira iha distritu hodi labele implika bá servisu PNTL iha futuru wainhira UNPOL sai husi Timor-Leste.

## **Saida Mak UNPOL Halo Ona Bá Instituisaun PNTL?<sup>40</sup>**

### **1. Prosesu *Screening* (ta'is) bá PNTL**

**Liu tiha krize 2006, UNMIT, liu husi akordu ho Governu Timor-Leste, instaura (hakotu) tiha prosesu sertifikasaun bá pesoál PNTL hotu hodi halo triazen foun bá membru PNTL ne'ebé hola parte iha krimi no violénsia ne'ebé hale'o krize 2006. Tuir mai dezenvolve tiha prosesu sertifikasaun hodi inklui revizaun ida kompletu liu kona-bá membru ida-idak. Prosesu triazen ne'e remata iha fulan Sanolu Resin Neen nia laran (Dezemburu 2007).<sup>41</sup>**

Prosesu revizaun ne'e halo konsultasaun bá Igreja, tribunais, no Sociedade Sivi; hodi partisipa liu husi hatama informasaun kona-bá membru PNTL. Painei avaliasaun konsiste husi Deputadu Ministru Interior, representante husi UNPOL, ofisiál ida husi gabinetei Prokuradoria-Jeral nian, representante ida husi Igreja no membru ida husi Konsellu Supremu ba Defeza no Siguransa.<sup>42</sup> Prosesu revizaun no triazen foun bá membru PNTL núdar parte ida husi papel UNPOL atu halo konsolidasaun fila fali instituisaun PNTL antes tama faze ikus UNPOL entrega poder.

Atu hetan sertifikasaun kompleta, tenki kompleta tiha kursu treinamentu semana ida, tuir mai hala'o treinamentu, servisu ho asesoria UNPOL ida (ICG, 2008). Iha Juñu 2008, funsionárius PNTL 599 deit mak hetan sertifikasaun kompleta numeru 2,500 mak liu husi sertifikasaun provizória. Sistema sertifikasaun hetan krítika hanesan la efektivu, burokrátiku liu. Laiha membru ida maka eskluidu husi servisu maske iha kestaun sériu kona-bá sira ninia asaun ka involvimentu iha krimi krizi 2006 nian.<sup>43</sup>

UNPOL hetan kritika maka'as no mosu protesta bar-barak husi publiku, liu-liu membru PNTL tanba konsidera la justu no transparente. Tanba informasaun husi UNPOL nian balun lalos kona-bá dadus involvimentu membru PNTL iha krimi halo komisaun tenki halo prosesu foun tan hodi bele konfirma lolos dadus ne'e.<sup>44</sup>

<sup>39</sup> Media STL Edisaun Sigunda, 08 Setembru 2012

<sup>40</sup> Atu bele iha balansu informasaun FM hasai karta pedidu entrevista iha laron 11 Setembru bá Komandu Jeral PNTL, Longuinhos Monteiro no laron 14 Setembru haruka tan karta pedidu bá Adjuntu Komandante Jeral PNTL, Afonso de Jesus maibé to'o publikasaun relatoriu ne'e seidak iha konfirmasaun.

<sup>41</sup> Relatoriu CIGI: Monitor ba reforma seitor siguransa Timor-Leste. Dezemburu 2009, Nú. 1.p8

<sup>42</sup> Buletin La'o Hamutuk Edisaun 2007.

<sup>43</sup> <http://www.ssrresourcecentre.org/wp-content/uploads/2010/06/SSRM-East-Timor-v.1-Tetum.pdf>

<sup>44</sup> Diskusaun Limitadu: Problema Promosaun PNTL, Sexta, 16 Jullu 2010.



## 2. UNPOL Nia Involvimentu Fo Promosaun Bá PNTL

Prosesu pomosaun bá polísia ninia baze legal maka, dekretu lei Nú. 9/2009 lei organika PNTL nia, ne'ebé rekere iha artigu 42 kosta ona katak rejime kareira no promosaun bá polísiamentu sei halo tuir rejime espesial ruma. Dekretu lei Nú. 16/2009 18 Marsu Rejime Promosaun Polísia Nasional Timor-Leste nian. Ho baze legal ne'e hodi ajuda hala'o mudansa bá postu ka diviza bá polísiamentu nian. Tuir lei refere promosaun fahe bá kategoria hat (4) no postu 13.<sup>45</sup> Hanesan ita hotu hatene fou-foun hari'i instituisaun PNTL, nia strutura iha postu 4 deit, hanesan Ajenti, Ajenti Prinsipal, Superintendenti no Inspeitur. Maibé bazeia bá Dekretu Lei Nú. 16/2009, aumenta postu PNTL bá 12, hanesan Komisariu, Superintendenti Xefi, Superintendenti. Ofisial Inspeitur, Inspeitur Xefi, Inspeitur Asistenti, Sarjetu Xefi, Premeiru Sarjetu, Sarjentu, Ajenti Xefi, Ajenti Prinsipal no Ajenti.

Politika reforma seitor siguransa iha instituisaun PNTL no re-strutura hikas funsionamentu instituisaun, tanba iha krize 2006, instituisaun PNTL rahun. Fo-foun hanoin atu halo deit konkursu, hanesan ne'ebé aplika bá instituisaun F-FDTL iha momentu ne'ebá. Maibé tanba prosesu momentu ne'e konsidera rezimi tranzitoriu, maka politika reforma seitor siguransa no re-strutura instituisaun PNTL, tenki liu husi prosesu promosaun. Kriteria partisipantes bá promosaun, membru PNTL hotu antes atu tama bá promosaun tenki ta'is uluk liu husi filtru 3, hanesan : Filtru I. Sertifikasaun Provisoriu, Filtru II kona-bá disiplina no Filtru III mak kona-bá involvimentu krimi nian.<sup>46</sup>

Komisaun Promosaun Deviza PNTL ne'e kompostu husi Timor-oan no membru balun husi Portugal, Australia, Nova Zelandia, Singapura. Verifikasaun mai husi instituisaun kompetente sira hanesan Ministeriu Publiku, Tribunal, painel avaliasaun, involve mos Nasoens Unidas sira.<sup>47</sup> Maske nune'e, supreza boot ida mak laiha transparensia informasaun husi UNPOL nian kona-bá dadus involvimentu membru PNTL iha krimi ne'ebé afeita bá filtru sertifikasaun parte III nian,<sup>48</sup> halo Komisaun Promosaun sai ulun moras no tenki halo prosesu foun hodi bele konfirma lolos dadus ne'e.

Atu kompleta preokupasaun publiku kona-bá rekursu umanu iha instituisaun PNTL, tinan ida ne'e governu loke tan vaga promosaun hamutuk 2.449 bá membru PNTL atu konkore. Postu Superintendente vaga 3 ho ninia numeru kandidatu 39, postu Inspetor Xefi vaga 35 ho numeru kandidatu 311, postu Inspetor Asistente vaga 125, Serjentu Xefi vaga 95, postu Inspetor vaga 30 numeru kandidatu 230, postu Inspetor Asistente vaga 125 ho numeru kandidatu 95. Vaga bá Inspetor Asistente hamutuk 79 ho numeru kandidatu 186, Serjentu Xefi vaga 111 ho kandidatu 414 mak konkore,<sup>49</sup> no kriteria kuinesementu profesional inklui psikolojia. No, teste boot ida bá instituisaun PNTL hafoin UNPOL retira husi Timor-Leste mak iha tinan 2013 to'o 2014 sei asumi funsaun importante ida mak ka'er pasta Prezidencia Konsellu Xefi Polísia CPLP.<sup>50</sup> Ida ne'e Tuir Fundasaun Mahein núdar orgullu boot bá governu Timor-Leste, partikularmente instituisaun PNTL, tanba ne'e husu bá governu atu

<sup>45</sup> Dekretu Lei N.º 16 /2009 de 18 Marsu Rezime Promosaun Polísia Nasional Timor-Leste.

<sup>46</sup> [http://mysweetlandtimorlorosae.blogspot.com/2010\\_07\\_01\\_archive.html](http://mysweetlandtimorlorosae.blogspot.com/2010_07_01_archive.html)

<sup>47</sup> Mahein Nia Lian Nú 15: Rekrutamentu ba PNTL: Dalan Naruk ba Profesionalismu. p5-6.

<sup>48</sup> [http://mysweetlandtimorlorosae.blogspot.com/2010\\_07\\_01\\_archive.html](http://mysweetlandtimorlorosae.blogspot.com/2010_07_01_archive.html)

<sup>49</sup> Media Independente, Tersa, 25 Setembru 2012.

<sup>50</sup> Media Diariu Nasional Edisaun, Kuarta, 17 Outobru 2012

kolabora hamutuk UNMIT, liu-liu UNPOL hodi perpara instituisaun PNTL antes akat-ain husi Timor-Leste.

Ida ne'e tuir Fundasaun Mahein importante duni no lojiku maibe prosesu ne'e mak hatudu ona governu nia transparansia iha prosesu promosaun? Hare'e ba kriteria ne'ebe iha bele mos konsidera nudar diskriminasaun tanba membru PNTL sira ne'ebe durante ne'e dook husi kapital Dili no nunka hetan treinamentu sei la bele kompete ho PNTL iha kapital ne'ebe hetan oportuidade barak tuir formasaun profesional nian. Ho ida ne'e, Fundasaun Mahein prezisa diskute didik kona-ba kriteria ne'ebe iha atu la bele hamosu polimika entre membru PNTL sira iha futuru.

### **Papel UNPOL Depois Transferensia Poder<sup>51</sup>**

UNPOL kontinua apoiu ba PNTL depois entrega poder ba PNTL, liu husi *Joint Development Plan* foka ba area Lima mak: Lejizlasaun, Treinamentu, Administrasaun, Disiplina no Operasaun.<sup>52</sup> Husi aspeitu ne'e Fundasaun Mahein sei halo analiza klean kona-ba formasaun no treinamentu husi aspeitu balun ne'ebe UNPOL fornese ba PNTL durante ka'er komandu antes entrega poder total iha 27 Marsu 2011.

#### **1. Aspeitu Treinamentu no Formasaun Disiplina**

Kestaun rekursu umanu nudar parte prinsipal ida atu dezenvolve instituisaun PNTL. Liu husi apoiu UNPOL kria sistema foun ida ba rekrutamentu ajente sira no preparasaun ba Polisia Nasionál Timor-Leste ne'ebe fasilita husi Guarda Nasionál Republikana (GNR) Portugal. Prosesu ne'e estabesele tiha ona, la'os deit halo rekrutamentu maibe mos iha formasaun. Objetivu boot mak atu halo diak liutan kapasidade ajente sira nian.<sup>53</sup>

Iha alterasaun ida ne'ebe previstu tiha ona ba rekrutamentu foun mak diminuisaun idade kandidatu sira nian. "idade ne'ebe previstu mak husi tinan 18 to'o tinan 23. Polisia balun ho idade ne'ebe mak avansadu, no hanoin kona-ba ida ne'e, ami kria ona Lei Reforma, maibe ita prezisa rekruta membru foun, liu-liu ba foin sa'e sira, atu ita bele asegura prosesu ida ne'ebe viavel liu ba kontinuidade PNTL nian", dehan Sekretariu Estadu Siguransa, Francisco Guterres.<sup>54</sup>

UNPOL mos fo treinamentu ka formasaun kona-ba sertifikasaun provizoria no sertifikasaun kona-ba kilat, no atu fo apoiu ba programa orientasaun. Hala'o mos kursu (hamutuk ho Sentru Formasaun Polisia nian) ho objetivu atu hasa'e kompetensia iha area jestaun nian, inklui kursu ba komandante eskuadra PNTL sira no komandante distritu sira, no mos kursu espesializadu kona-ba protesasaun siguransa besik (polisiamentu komunitariu, inteligensia bazika no investigasaun disiplinlar.<sup>55</sup>

Maske nune'e, tuir Fundasaun Mahein monitorizasaun katak preokupasaun publiku liu-liu maka membru PNTL balun kontinua la halo-tuir regulamentu no viola padraun direitus umanus baziku, nafatin uza forsa no kilat iha atusaun. Hanesan; membru Task Force tiru

<sup>51</sup> Atu hetan informasaun balansu husi parte PNTL; FM haruka karta pedidu entrevista ba Komandante Jeral PNTL, lora 10 Setembru 2012 maibe laiha konfirmasaun to'o relatoriu ne'e publika.

<sup>52</sup> Mahein Nia Lian Nú. 21, 21 Jullu 2011.p3.

<sup>53</sup> [www.benvindodezenvolvimentu.blogspot.com](http://www.benvindodezenvolvimentu.blogspot.com) , Segunda, 30 Maiu 2011.

<sup>54</sup> <http://www.benvindodezenvolvimentu.blogspot.com/2011/05/rekrutamentu-no-formasaun-foun-ba.html>

<sup>55</sup> <http://www.un.org/en/peacekeeping/missions/unmit/mandate.shtml>

mate estudante UNDIL iha Hera (15 Julu 2012),<sup>56</sup> membru Unidade Patrollamentu Fronteira (UPF) tiru mate Lulu, Estudante Eskola Sekundaria No. 2 Malibaka, Maliana (04 Novembru 2011),<sup>57</sup> membru PNTL husi Unidade Task Force tiru mate Valdamir Cesar Lebre *alias* Kuka iha Delta-Nova (29 Dezembru 2009)<sup>58</sup> no seluk-seluk tan.

Ida ne'e hatudu katak apezarde hetan ona dezvoltimentu diak iha nivel nasional, mekanizmu disiplinár iha nivel distritu kontinua fraku. Funsau no responsabilidade husi PNTL dala-ruma malahuk, pelumenus iha nivel operasionál.<sup>59</sup> Tan ne'e Fundasaun Mahein Rekomenda atu kontinua haforsa rekursu umanu liu husi formasaun no edukasaun inklui hametin disciplina bá membru PNTL iha futuru oin mai.

## **2. Aspeitu Operasaun**

Bazeia bá mandatu prinsipál UNPOL iha momentu ne'ebá mak "deztolvimentu no fortaleza" PNTL. Ida ne'e konsiste husi Sentru Operasaun Nasionál, Polítika Komunitade no Unidade Umanitária, Unidades Polisia Formada, Gabinete Koordenasaun Tráfiku Nasionál, Unidade Protesaun Siguransa Besik, Unidade Operasaun Espesiál, Gabinete Koordenasaun Patrulla Fronteira no Siguransa Eleitorál inklui Unidade Planeamentu.

Parte Unidades Polisia Formada (FPU), ne'ebé inklui Malaysia, Bangladeshi, Portugéz no kontinzentas Pakistaun, tau baze permanente iha Dili, Baucau no Maliana. Utiliza sira bá operasaun espesiál, fornese siguransa estátika no hetan despasu hodi kontrola distúrbu no revolta sivil. Unidade Polisia Formadu Portugés fornese mós protesau besik ba ulun boot sira governu nian.<sup>60</sup> Maske nune'e, tuir Fundasaun Mahein ninia monitorizasaun pelu kontrariu UNPOL la konsege perpara polísiamentu komunitaria tuir filozofia natureza PNTL nian.<sup>61</sup> Maibé PNTL armadu maka'as liu padraun barak, no iha tendénsia funsiona hanesan forsa para-militar.<sup>62</sup> Realidade ne'e hatudu liu husi atuasaun PNTL iha terenu wainhira iha konfliktus ruma ne'ebé uza forsa hodi viola fali diretus umanus. Ho ida ne'e Fundasaun Mahein husu bá governu atu reforsa papel polisia komunitaria atu nune'e bele minimiza atuasaun ho forsa maibé oinsa halo prevensaun bá konfliktus.

## **3. Monitoriza no Advokasia**

Mandatu UNPOL ne'ebé hakesi iha Akordu Suplementar katak wainhira remata intrega poder UNPOL nafatin fo monitorizasaun no advokasia bá PNTL iha parte tekniku hanesan haforsa lei, administrasaun, treinamentu, operasaun no disciplina. Iha oportunidade ne'e UNPOL nia papel importante oinsa halo planeamentu no identifikasaun bá nesesidade baziku iha polísiamentu distrital nian, ajuda perpara draft planeamentu servisu polísiamentu nian, perpara planu objetividade rede bá distritus/unidade estratejia nivel nasional, ajuda no kolabora ho dezvoltolve estandarizasaun kona-bá terinamentu espesializada, apoiu halo

<sup>56</sup> Media Radio Liberdade, Segunda, 16 Julu 2012.

<sup>57</sup> Media STL Edisaun, Tersa, 8 Novembru 2011.

<sup>58</sup> Mahein Nia Lian Nú 25, 30 Novembru 2011.p3.

<sup>59</sup> Relatóriu Periódiku kona-ba Dezvoltimentu Direitus Umanus Timor-Leste; 1 Juñu 2009-30 Julu 2010.p8.

<sup>60</sup> Relatóriu CIGI: Monitor ba reforma seitor siguransa Timor-Leste. Dezembru 2009.p6.

<sup>61</sup> Dekretu Lei Nú 16/2009: Kapítulu I Artigu 1 Alinea 2.

<sup>62</sup> <http://www.ssrresourcecentre.org/wp-content/uploads/2010/06/SSRM-East-Timor-v.1-Tetum.pdf>.

preparasaun bá relatoriu mensal kona-bá implementasaun servisu polísiamentu nomos ativamente halo seminar, formasaun *Training of Trainer* (TOT), no workshop.<sup>63</sup>

Maske nune'e to'o ohin loron rekursu umanu sai dezafiu boot iha kontestu instituisaun PNTL bá prosesu dezenvolvimentu instituisaun hodi fornese siguransa ne'ebe diak bá komunidadade.<sup>64</sup> UNPOL núdar monitorizador no advokasia bá PNTL la konsege hatudu vontade diak iha Eleisaun Jeral Prezidensial no Parlamentar 2012 tanba prezensa UNPOL iha sentru votasaun sira ladún masimu, membru UNPOL balun tarde iha sentru votasaun inklui polísia lokal sira.<sup>65</sup>

Maibé antes ne'e, atu responde bá eleisaun jeral 2012, PNTL - UNPOL dezenvolve tiha ona planu kapasitasaun ne'ebé kuiñesidu hanesan Planu Dezenvolvimentu Konjunta, Iha planu ne'e foka liu ba area lejislasaun, formasaun, administrasaun, disiplina no operasaun.<sup>66</sup> Planu Dezenvolvimentu Konjunta ne'e Komisariu UNPOL Luis Carilho konsidera núdar strategi importante tebes hodi hasoru eleisaun geral 2012 atu garante paz no estabilidade iha nasaun ne'e.<sup>67</sup>

### **Presepsaun Publiku Kona-bá Misaun UNPOL Remata**

Mandatu UNPOL iha tempu UNMISSET no UNMIT importante tebes bá instituisaun Polísia Nasional Timor-Leste. Husi periodu ne'ebé refere karik la'os tempu ne'ebé naton atu transfere matenek bá PNTL maibé pelemenus rai hela ona bukae balun bá PNTL durante UNPOL nia mandatu iha Timor-Leste. Tuir agenda misaun UNMIT sei remata iha Dezembru 2012. No, publiku dadaun debate namanas kona-bá kestaun siguransa wainhira UNPOL retira husi Timor-Leste. Iha biban ne'e Fundasaun Mahein mos koko sita presepsaun publiku relasiona ho mandatu UNPOL nian. Husi presepsaun hirak ne'e maioria fo hanoin pozitivu bá UNPOL hakat-ain husi nasaun ne'e, inklui rekomendasaun balun diriji bá governu atu fortifika instituisaun PNTL iha futuru.

Retirasaun UNPOL iha Timor-Leste núdar ezame ida bá kapasidade instituisaun PNTL atu ezerse ninia funsaun hanesan lutu bá siguransa internal. Maske nune'e to'o ona tempu duni UNPOL tenki sai no PNTL mak lidera siguransa ra laran nian. Xefi Suku Comoro Eurico da Costa dezafia governu atu tau atensaun masimu bá instituisaun PNTL, tanba profesionalizmu PNTL la mai mesak wainhira la kria kondisaun baziku sira hanesan; rekursu umanu, fasilidade, infrastutura, ekipamentus, salariu no seluk-seluk tan.<sup>68</sup>

Nune'e mos, eis vitima 12 Novembru 1991, Sergio Marques ne'ebé hela iha kapital Dili dehan paz no stabilidade iha nasaun ida ne'e la'os iha UNPOL nia liman maibé povu tomak nia liman, liu-liu juventude sira. Luta na'in ne'e fo konfiansa boot bá instituisaun Polísia Nasional Timor-Leste – PNTL no FALINTIL-Forsa Defeza Timor-Leste – F-FDTL bele asegura ambiente hakmatek bazeia bá progresu instituisaun estadu rua ne'e.<sup>69</sup>

<sup>63</sup> Modul Presentasi Power Point dari Polisi Malaysia: Peranan UNPOL, 14 Juñu 2011.p22-23.

<sup>64</sup> [http://www.fundasaunmahein.org/wp-content/uploads/2011/08/fm-nia-lian-21\\_21jullu-20111.pdf](http://www.fundasaunmahein.org/wp-content/uploads/2011/08/fm-nia-lian-21_21jullu-20111.pdf)

<sup>65</sup> Entrevista Charlie Scheiner husi Lao Hamutuk, Sigunda, 10 Setembru 2012

<sup>66</sup> <http://radioliberalidadedili.com/notisia/333-2012-pntl-unpol-halao-ezersisiu-hasoru-eleisaun-geral>

<sup>67</sup> Komunikadu Imprensa UNMIT, 28 Jullu 2011

<sup>68</sup> Entrevista Xefi Suku Comoro, Eurico da Costa, kinta, 13 Setembru 2012

<sup>69</sup> Entrevista Eis Vitima 12 Novembru 1991, Sergio Filomeno Marques, Kinta, 20 Setembru 2012.

Hanoim optimista ida kona-bá mandatu UNPOL atu remata mos mai husi estudante Universidade Nasional Timor-Leste – UNTL. Bazeia bá progresu situasaun siguransa rai laran nian, la'os tempu atu hakesuk malu kona-bá mandatu UNPOL atu remata. Hakarak ka lakohi tempu ona atu PNTL rasik mak sei asumi responsabilidade. Maske durante ne'e sempre mosu konfliktus la'os sai sasukat ida atu UNPOL nia misaun tenki mantein nafatin iha Timor-Leste.

Maibé presiza iha konsolidasaun masimu oinsa hari'i instituisaun ida ne'ebé mak imparcial, independente, la sadere ka afilia bá politiku pratika nian. Tanbá durante UNPOL ninia misaun atu dezenvolve instituisaun PNTL sai husi filozofia polisia komunitaria. No, kazu balun membru PNTL involve direktamente hanesan konfrontasaun ne'ebé hamihis tiha konfiansa povu bá PNTL. Instituisaun PNTL sai independente tenki ses husi intervensaun politika katak labele uza PNTL núdar forsa pesoal bá hatauk ema seluk.<sup>70</sup>

Lideransa juventude husi bairo ida iha kapital Dili konsidera prezensa UNPOL durante ne'e fo ona kontribuisaun pozitivu lubuk ida bá dezenvolvimentu PNTL no proteze povu nia moris. Maske nune'e merese duni UNPOL nia misaun tenki remata ona tanba fo ona poder siguransa bá PNTL tinan 2011. Maibé wainhira establidade mosu presiza timor-oan tomak nia kontribuisaun bá paz no hakmatek, la'os PNTL deit. Lideransa Timor-Leste sira mos tenki sukat nanal hodi koalia politika hasoru adversariu politika atu nune'e labele hamosu konfuzsaun iha povu nia leet.<sup>71</sup>

Nune'e mos ativista senior ida ne'ebé fo ninia kontribuisaun bá independensia Timor-Leste wainhira saran-lian bá Fundasaun Mahein katak nia ladún preoukupa kona-bá misaun UNPOL atu remata maibé ninia preoukupasaun mak UNPOL la konsege perpara PNTL ho profesional. UNPOL perpara fali polisia militeristiku no minum tebes UNPOL fo edukasaun kona-bá lei inklui fromasaun disiplin nian bá PNTL.<sup>72</sup>

Bazeia bá presepsaun husi publiku ne'ebé Fundasun Mahein oferta iha relatoriu ne'e bele konklui katak Timor-Leste núdar Estadu Diretu Demokratiku no soberania tenki hamrik ona iha nia ain leten atu asegura ninia povu husi atan bá moris tauk nian. Liu husi politika governu ne'ebé sustentabilide iha aspeitu sosial ekonomi, politika, osamentu no seluk-seluk tan. Maibé oinsa instituisaun PNTL bele forti no profesional wainhira lideransa husi SES no instituisaun PNTL mosu problema ne'ebé sai núdar lakuna ida entre sira?

Tanba tuir Fundasaun Mahein nia monitorizasaun durante ne'e identifika katak relasaun entre Sekretariu Estadu Siguransa Dr. Francisco Guterres no Komandante PNTL Komisariu PNTL Dr. Longinhos Monteiro ladún iha koordinasaun ne'ebé diak. Dala-barak problema balun akontese iha Komandu PNTL nian laran Komisariu PNTL hakat liu Sekretariu Estadu Siguransa no konsulta direita ho Ministru Defeza no Siguransa Xanana Gusmão.<sup>73</sup> Ho ida ne'e Fundasaun Mahein rekomenda katak persiza iha relasaun diak entre komandu PNTL ho lideransa SES nian bá futuru atu la bele fo sofre bá instituisaun PNTL.

---

<sup>70</sup> Entrevista Xisto dos Santos, Kinta, 20 Setmbru 2012.

<sup>71</sup> Entrevista Xefi Juventude Kuluhun, Jose Amaral, Kinta, 20 Setembru 2012.

<sup>72</sup> Entrevista Charlie Scheiner husi Lao Hamutuk, Sigunda, 10 Setembru 2012

<sup>73</sup> Mahein Nia Hanoim Nú 02, 06 Agostu 2012: Política Ministériu Defeza no Siguransa Periodu 2007 – 2012.p32.

## **Konkluzau**

Timor-Leste n'udar nasaun independente tuir Konstituisaun Kapitulu V artigu 146 no 147 governu no estadu iha obrigasaun atu asegura no garantia siguransa povu husi amesas esternal no internal, liu husi instituisaun F-FDTL no PNTL. Wainhira krizi politika militar 2006 mosu halo instituisaun rahun, liu-liu instituisaun PNTL ejize governu husu apoiu ONU liu husi UNPOL hodi rekopera fila fali situasaun bá iha ambiente hakmatek nian.

No, husi apoiu UNPOL iha 2006 to'o ohin loron pelemenus fo ona kontribuisaun pozitivu ida bá dezenvolvimentu instituisaun PNTL maske parte balun ne'ebé sei koak no malahuk hela. Tanba ne'e, governu presiza kria politika ida ne'ebé diak hodi kontinua haforsa no hametin instituisaun PNTL, liu husi formasaun no treinamentu hodi nune'e bele koresponde situasaun real iha Timor-Leste wainhira misaun UNPOL remata iha tinan ida ne'e.

Maske la'os buat ida ne'ebé fasil bá governu atu prepara polísiamentu ne'ebé profesional tuir padraun internasional iha tempu badak maibé pelemenus planu dezenvolvimentu instituisaun PNTL marka ona iha agenda politika bá longu prazu nian. Ho nune'e bele prepara diak liu tan polísiamentu ne'ebé modernu tuir mundu globalizasaun nian.

## **Rekomendasaun**

1. Rekomenda bá governu atu kontinua fortifika polísiamentu komunitaria ne'ebé UNPOL hala'o tiha ona, no evita formasaun ne'ebé ho karakteristika *para-militar*.
2. Rekomenda bá governu atu kontinua hametin koperasaun bilaterais, hodi hasa'e kapasidade PNTL iha area rekursu umanu, administrasaun, disiplina, lejlzasaun no operasaun nian.
3. Rekomenda bá governu atu kontinua fo perioridade kona-bá infraestrutura baziku bá PNTL hanesan Eletrisidade, komunikasaun no fasilidade seluk, ne'ebé durante ne'e fornese husi UNPOL hodi apoiu servisu Komando Distrital sira.

## Bibliografia

### **Dokumentus:**

Konstituisaun Republika Demokratika Timor-Leste

Akordu Suplementar 2006

Lei Organiku Polisia Nasional Timor-Leste

Relatóriu Periódiku kona-ba Dezenvolvimentu Direitus Umanus Timor-Leste; 1 Juñu 2009-30 Jullu 2010

Relatoriu CIGI: Relatoriu CIGI: Monitor ba reforma seitor siguransa Timor-Leste. Dezembru 2009, Nú. 1.

Relatoriu Fundasaun Mahein (FM) nian

Modul Presentasi Power Point dari Polisi Malaysia: Peranan UNPOL, 14 Juñu 2011  
Monthly Government Report-March 2011. UNMIT Government.

Relatóriu husi Sekretáriu-Jerál kona-bá UNMIT: (períodu 20 Janeiru to'o 24 Setembru 2010)

### **Media:**

Media Independente, Tersa, 25 Setembru 2012

Tempo Semanal Edisaun 109: Tersa, 28 Outobru 2008

Media Tempo Semanal, Tersa, 21 Outobru 2008.

Media Tempo Semanal, Sigunda, 06 Maiu 2011.

Media Suara Timor Lorosa'e (STL), Tersa, 05 Febreiru 2008

Media Suara Timor Lorosa'e (STL), Sigunda, 28 Marsu 2011

Media Suara Timor Lorosa'e (STL), Sigunda, 08 Setembru 2012

Media Diariu Nasional, Kuarta, 17 Outobru 2012

Jornal The Dili Weekly, Tersa, 24 Janeiru 2012

Media Radio Liberdade, Sigunda, 16 Jullu 2012;

Buletin La'o Hamutuk Edisaun 2007

### **Internet:**

<http://benvindodezenvolvimentu.blogspot.com/2011/05/rekrutamentu-no-formasaun-foun-ba.html>

<http://www.ssrresourcecentre.org/wp-content/uploads/2010/06/SSRM-East-Timor-v.1-Tetum.pdf>



[http://mysweetlandtimorlorosae.blogspot.com/2010\\_07\\_01\\_archive.html](http://mysweetlandtimorlorosae.blogspot.com/2010_07_01_archive.html)

<http://www.un.org/en/peacekeeping/missions/unmit/mandate.shtml>

[http://www.crisisgroup.org/en/regions/asia/south-east-asia/timor-leste/180-handing-back-responsibility-to-timor-lestes-police.aspx?alt\\_lang=id](http://www.crisisgroup.org/en/regions/asia/south-east-asia/timor-leste/180-handing-back-responsibility-to-timor-lestes-police.aspx?alt_lang=id)

<http://temposemanaltimor.blogspot.com/2008/10/tempo-semanal-edisaun-109.html>

**Entrevista:**

Entrevista Charlie Scheiner husi Lao Hamutuk, Segunda, 10 Setembro 2012

Entrevista Xefi Suku Comoro, Eurico da Costa, Quinta, 13 Setembro 2012

Entrevista Xefi Juventude Becora, Sergio Filomeno Marques, Quinta, 20 Setembro 2012

Entrevista Xisto dos Santos, Quinta, 20 Setembro 2012

Entrevista Jose Amaral, Quinta, 20 Setembro 2012